

洋防輯要卷七

福建方輿紀要

淑浦嚴如煜樂園輯

安康張鵬飛補山梓

海

海在福建爲至切之患漢元封初伐東越遣橫海將軍韓說出句

章

章即浙
慈谿縣

浮海從東方往遂滅閩越三國吳建衡初遣軍自建

安海道與荊州之師會於合浦

合浦即廣
東廉州府

以擊交趾陳天嘉四年

章昭達自東興度嶺趨建安討陳寶應詔余孝頃督會稽東陽臨

海永嘉諸軍自海道會之昭達敗寶應水柵諸軍方攻其步軍孝

頃自海道適至因併力乘之寶應敗滅隋開皇十年泉州王國慶

作亂自以海路艱阻不設備楊素泛海奄至擊平之五代漢初吳

越遣將余安自海道救李達遂有福州宋德祐二年張世傑等共

立益王昞於福州蒙古將阿剌罕自明州海道來襲福州旋陷明

初討陳友定亦命湯和由明州海道取福州八閩悉定洪武十九年倭氛告警乃命江夏侯周德興經理閩海置烽火南日浯嶼三寨於海中正統九年以侍郎焦宏蒞其事則遷烽火南日於內地景泰二年尚書薛希璉出而經畧又遷浯嶼水寨於廈門議者以爲棄其藩籬矣是時雖增置小埕銅山二寨沿邊衛所鎮戍之設漸加密焉而奸商釀亂勾引外夷自潮州界之南澳及走馬溪舊浯嶼南日三沙一帶皆爲番舶所據浸淫至於嘉靖二十七年以後禍乃大發論者謂東南之倭亂閩實兆之也自是審斥堠嚴會哨寇去之後猶亟亟不敢懈焉蓋刻戍於海上而哨守於海中不易之法矣說者曰海中島嶼東南錯列以百千計但其地有可哨而不可守者有可寄泊而不可久泊者若其最險要而紆迴則莫如澎湖蓋其山周遭數百里隘口不得方舟內澳可容千艘往時

以居民恃險爲不軌乃從而虛其地馴至島夷乘隙巢穴其中力圖之而後復爲內地備不可不早也又海中舊有三山之目澎湖其一耳東則海壇西則南澳皆並爲險要守海壇則桐山流江之備益固可以增浙江之形勢守南澳則銅山元鍾之衛益堅而可以厚廣東之藩籬此三山者誠天設之險可或棄而資敵歟

福州府

東至海岸百九十里南至興化府二百八十里西南至泉州府五百里西至延平府四百有五里北至福寧州五百四十

五里白府治至京師六千一百三十三里

府西阻重山東帶滄溟南望交廣北毗淮浙亦東南一都會也然而延建諸郡控我咽喉福寧一州扼我項背興泉諸郡伺我肘腋揚帆突至則有海道之虞踰險巖馳實切上游之懼封疆不可憑山谿不足恃國門以外皆戰場也三山之險誠不在近郊而在四境矣宋蔣之奇曰八閩之地長樂郡爲冠以其地肥衍民殷富而濱

海足以自固也噫是豈折衝之長策哉

閩縣附郭在府治東南漢置治縣屬會稽郡

侯官縣附郭在府治西南漢爲治縣

釣臺山城南九里崇阜屹立俯瞰大江舊記漢東越王餘善於此釣得白龍以爲己瑞因築壇曰釣龍臺後人呼爲越王臺今亦名南臺山建江經此曰南臺江五代周顯德三年南唐建州帥陳誨敗吳越兵於福州南臺江明初湯和自明州渡海攻福州奄至五虎門駐師南臺福州遂下今爲厝市山去江百餘步

平山在府東南三十二里志云城東南三十里有鳳山鼓山支隴山其東爲平山宋少帝航海駐兵於此剗平其頂時因之名又羅星山在府東南五十里馬江中登之百里內諸山皆在左右爲遠近奔流之砥柱又南五里曰大象山其山巍峩廣大爲城南之巨障

有峯曰銀峯下瞰馬頭江江之南曰白田山卽晉巖高欲遷城處也又九龍山在府東南六十五里九峯插天狀若龍騰下有潭潛通馬頭江

五虎山府東百里大海有五虎門與江口相接明初湯和由海道取福州處也山下爲官毋嶼巡司置於此相近者有浮江山亦曰文筆山對峙者曰王捕山居民皆以捕魚爲業又琅琦山亦在府東海中一名羅崎山其旁又有清洋福斗諸山

海府東南二境皆濱海唐志閩縣東五里有海堤太和三年縣令李茸築先是每六月潮水鹹鹵禾苗多死堤成瀦溪水殖稻遂成良田又海防考福州境內有閩安鎮東定海關下娘媽宮濂澳鑑江館頭小埕牛田東營後瀛松下大小社諸處皆海口登犯之衝而備禦之所也

閩江府城西南七里自建寧延平二府境流經古田閩清二縣界復東南流至府西北八十里之白沙驛亦曰馬瀆江亦曰螺女江雪峯山以東諸溪之水皆流合焉南流分二派一派自北而東歷侯官市至芋原驛瀆江有石畧山亦曰石畧江又南至府西七里曰洪山江亦曰洪塘江經城南七里曰金鎖江又南經釣臺山下曰南臺江亦曰白龍江又東南經鼓山下而東出匯爲馬頭江一派自西而南經府西南三十里高蓋山又南至方山北曰淘江亦曰瀨江又名黃江亦名黃岸江循山西麓又南至仙琦山曰仙琦江亦曰湯岐江復折而東流二十餘里曰峽江經府東南五十餘里接馬頭江又東爲琅琦江至五虎門以入於海志云馬頭江爲閩縣極南界西北衆流悉入焉風濤洶湧中有巨石形如馬首隨潮隱見爲行舟患大抵閩江上流至馬瀆漸廣而緩馬頭當衆流入

海處勢尤浩瀚也

白蝦浦在府南五代漢初南唐圍李仁達於福州吳越將余安自海道赴救至白蝦浦海岸泥淖布竹簣而前既登崖奮擊南唐兵大破之或曰白蝦浦卽白龍江別名也又有直瀆浦舊從江岸開河口通潮北流至故海晏門爲澳橋浦又北通於東湖今亦廢郡志南臺江舊自河口而北繚繞三十有六曲爲城南濠分引自水步門水關宏治中鎮守內臣鑿新港遂失故轍云

閩安鎮府東四十里有巡司洪武二年置爲會城東面之險要海防考海水潮汐與馬江匯於閩安鎮有兩口一東出雙龜門外繞壺江五虎一南出琅琦門外遶广石梅花閩安爲江海之鎖鑰而會城之門戶也嘉靖中倭寇突犯閩安參將尹鳳擊敗之賊由此突犯福清縣今仍爲戍守處又有閩安稅課局與巡司同置

五縣若在府西北五十里有巡司元置明朝因之志云司舊屬懷安

縣接閩縣侯官古田閩清凡五縣界因名又竹崎巡司在府西北

六十里濱江正統六年置

長樂縣

府東南百里有南至福清縣百
里北至連江縣百二十里

海縣北五里又縣東南東北境皆濱海山港澳嶼回環爲險海防考

縣西北閩安鎮五虎門諸處實爲省城門戶東北广石梅花所突

入海中與連江縣定海所相對亦省城右臂也自梅花至松下巡

司中歷十一澳皆東沿大海波濤衝激並岸水淺寇船難近獨松

下漸南與福清接壤廣浙商船往往泊此海壇也其東南亦有觀

音澳蘇澳可以暫憩故松下之備宜豫新唐書縣東十里有海堤

唐太和七年閩邑令李茸築立十斗門以禦潮且爲旱澇之備於

是境內遂成良田宋時嘗因舊址修築

元祐港縣東南三十里宋元祐中令袁正規以縣境田多窪下因鑿港以道溢水流通漳港以入於海因名其相近有卓嶺港舊亦入漳港元大德初濬人縣東四十里陳塘港入海志云陳塘港宋末陳文龍築田砌塘因名水源自海花山而下會東西濱澗湖並七十二洋之水下流達海又縣南有沙京港亦名普塘港又有嶺柄等港皆引水溉田下流入海

延祥湖在縣南三里宋元時故址明朝正統中修濱深廣潮汐往來可通舟楫又南數里有桃枝湖舊周五百餘丈五代時王闢所鑿今名桃坑湖又南有橫嶼湖亦唐宋時故址周三百餘丈今故址猶存

松下鎮縣東南三十五里有巡司洪武初置於福清縣海口二十年移置於此爲長樂之咽喉福清之門戶嘉靖三十七年倭賊自松

下突入海口澳登陸攻福清之鎮東衛官軍力戰乃近去三十九年議築城未就崇禎中始成之周二里有奇有門四水關一稍東北有旗山濱海置烽火於此又小社巡司在縣東二十五里崇禎六年移置於大社澳南去舊治數里

黃崎寨縣東北四十餘里志云縣有仙崎寨广石寨東山寨與黃崎爲把截四寨又有大社捍寨近大社澳俱爲濱海之備

福清縣

府東南百二十里東北至長樂縣百里西南至興化府百二十里本長樂縣地

白嶼山縣南百里海濱一名陳田山絕頂有鴻休巖巖竇天成下瞰

滄溟浩無涯際昔有僧鴻休者居此而名其相連者曰雙嶼以二山突起海中也有井甚甘冽旁有山曰壁頭山又金山在縣東南百里居民繞山麓而前後左右皆海也又東南十里曰萬石山巖洞玲瓏洞之廣者可容萬人而千百人者不可數計又南數里

卽萬安所城矣

海壇山縣東南七十里海中周七百里其山如壇南北長而東西狹
上多雲氣亦名東嵐山唐牧馬地後漸有寺宇宋初置牧監尋以
駕驛罷皇祐中許民耕墾淳熙中有三千餘戶其山南曰黃崎曰
紫闌曰牧上曰砦頭曰沆頭曰大小鼃綱有三十六派湖環繞峯
巒如畫宣和以後大雨雹湖皆決入於海近塢有大小場汧頭及
錢藏皆爲泊船澳迤東高者爲軍山王氏時譴戍多居此其間曰
浚門曰獺步曰廣州埕曰流水隔東江曰小牆小牆北曰十二藍
蕉東牆北曰白兵蕉大桑小桑兩桑間曰桑門而兩牆間爲鷗鷀
門是外極東之島而舟不可行矣迤南有南匿里亦曰南匿嶼舊
產鹽宋於此設巡司其北有沙澳亦曰蘇澳又有沙溪行一日皆
沙而澳當海口爲寨又五里西抵鍾門亦曰鍾山嶼玲瓏如鍾拔

蒲四圍海水鹽鹵而此泉獨淡近嶼石高二丈狀如媼東南瞰石
方二十丈其中井泉與潮侯應取水者集焉亦船舶之都會也半
潮抵磁澳則爲長樂縣界又有草嶼唐嶼皆近於南匿南匿阨陋
且風多不宜樹一曰大姨山當日未出時極望有如空青微露水
面爲小琉球國海水深碧東流不返莎蔓如組舵不容轉必刳木
爲盂乃能旋開浮沙以濟暴風不風避者往往漂至於此中國人
爲其所得以藤貫其足令之耕作故此山昔忌夜火恐其國望之
而來也是爲東角洋蓋極海之窮徼矣又有支山曰水馬山有石
如舟帆亦名石帆山相近者曰霸前曰金崎頭此海壇之西麓也
海防畧海壇山盤踞聳峙迴出海上故元時民戶嘗滿四萬多以
魚爲業中有西湖相傳嘗產龍駒湖之東羣山環互不可勝紀外
隔小琉球三晝夜內通海口至縣僅一潮中間以村名者百有餘

處陂湖潭澳不一而足其著者曰葫蘆澳多魚碧沙洋產人參其
百花砦鍾門三鎮街衢圓圓景物繁多真海表名區也明初遣江
夏侯視海防倭尋以衛弁李彝欺妄詔虛其地惟以小埕水砦官
兵汛守隆慶初始添設海壇遊兵萬歷中復命增設水砦與興化
府南日砦相形援後復廢弛

蒜嶺縣西南五十里以山形如蒜瓣而名一云以山石間多產蒜也
登其巔東望漲海瀾漫無際舊有照海亭

海縣東五十里志云縣東南至海百五十里南至海百二十里而海
壇雙嶼諸處爲汛守要地又縣東近境之海謂之九海以港嶼曲
折也其外爲大海

海口鎮縣東十里宋里人林遷新建有城亦曰海口鎮民城周四里
有奇明朝嘉靖三十四年倭寇來攻以城壞爲倭所陷尋改築之

自是倭夷屢犯鎮以城堅得免志云鎮東北倚龍山鎮南二里卽瑞巖山也元置海口務於城內明初改爲海口稅課局並置河泊所於此又有海口場鹽課司元延祐六年建本名司令司明初改爲運鹽分司洪武二十年改鹽課司又牛田場鹽課司在縣東南三十里建置同海口鹽課司

壁頭山鎮在縣南百餘里壁頭山下志云元置於南日里名南日巡司明朝洪武十二年移置於此今改名又牛頭門巡司在縣東南百里元末置於逕江口名逕江巡司亦洪武十二年移置此改今名又澤朗山巡司在縣東南七十里元置於練門名練門巡司亦洪武十二年移改

松下寨縣東北五十里接長樂縣之松下巡司濱海捍寨也志云縣境自東而南有平北里有平南里沙塢連盤長沙峯頭與松下爲

七寨外有松關永平白鶴峯頭大坵牛頭等六砦舊皆設兵戍守

連江縣

府東北九十五里南至長樂縣百二十里漢治縣地

荻蘆山縣東南四十里一名九龍山下有荻蘆峽亦名九龍江俗傳

秦始皇以東南氣王自江而南山秀拔者皆鑿之鑿此得蘆根長數丈斲之流血因名宋淳祐二年置荻蘆寨於此有水軍千人亦曰武濟水軍

馬鞍山在縣東北五十里山勢逶迤達於海上有雙樹連聳狀若馬鞍又東有三德山三峯並列下瞰海門舊名三台山亦曰筆架山志云縣北四十里有香爐山其形聳秀上有童井雖旱不涸道書以爲七十一福地

上竿塘山縣東北八十餘里大海中峯巒屈曲有竹扈湖尾等六澳又有下竿塘山突出海岸山形峭拔與上竿塘山並峙中有白沙

鏡港等七澳洪武初徙其民於內地三山志上下竿塘大小亭山桑嶼關嶺蛤沙北茭鎮俱在縣東北海中相近又有拱嶼澳嘉靖三十五年倭賊犯縣官軍擊却之賊夜遁由拱嶼澳出洋是也海縣東二十里志云縣東南至海三十五里與長樂縣接界其與潮汝吐納者則官塘洋荻蘆峽黃岐堡鶴嶼諸處也而定海小埕皆爲戍守要地

北茭鎮縣東北百十里西北至羅源縣八十里本名荻蘆鎮宋時水砦蓋設於此元爲荻蘆巡司洪武二十年改今名並置城於此與定海相爲唇齒嘉靖二十七年倭賊流劫北茭官軍禦却之是也又蛤沙鎮在縣東北五十里崖石峭立如壁洪武十六年置河泊所於此二十年置城於此亦爲戍守處

小埕寨縣東百二十里海中明初置籌海說小埕北連界於烽火南

接壤於南日連江爲福郡之門戶而小埕又連江之門戶嘉靖三十五年倭賊自流汀突至小埕水寨遂犯會城蓋汛防要地矣又光臨里砦在縣西南亦明初置有兵戍守

羅源縣

府東北百五十里西南至連江縣百二十里西北至古田縣百三十里東北至福寧州寧德縣八十里本唐連江縣地

仙茅山縣東北十里兩山相連曰大茅小茅巖石甚勝又北五里爲洞官山峯巒錯立其著者爲五馬峯又東北有寶勝山黃沙溪山海縣東北十五里又東南接連江至海二十五里灘澳淺僻不利登涉故縣境之防禦爲畧通志縣東北至大海蓋二百里也

福州左衛府治東南洪武八年置右衛二十一年改爲左衛又福州右衛在左衛西洪武二十一年增置福州中衛在左衛東

梅花守禦千戶所在長樂縣東五十里本北鄉巡司治梅江頭山上洪武十年始築城爲備二十年移置巡司於蕉山改建梅花所增